

## Burī Ruheñ

**Injeel : Muhaafiz 5:1-20**

Īsā<sup>(a.s)</sup> aur unke shaagird jheel ko paar kar ke us kinaare par pahuñche jahaan Garaasaanes naam kī qaum rahtī thī. Ye log Ibraaheem<sup>(a.s)</sup> kī aulaadoñ me se naheen the. **(1)** Jab Īsā<sup>(a.s)</sup> naaw se utre to paas kī ek gufā se ek ādmī nikal kar unkī taraf dauḍā. Us gufā me murdā logoñ ko dafnaayā jaatā thā. Us ādmī par burī ruhoñ kā qabzā thā. **(2)** Us ādmī ko zañjeer se bhī baandhnā naamumkin thā. **(3)** Kaī baar logoñ ne us ādmī ke haath aur pair zañjeer se baandhne kī koshish karī lekin wo usko toḍ detā thā. Koī bhī itnā taaqatwar naheen thā ke wo us ādmī ko kaabu me kar sakeñ. **(4)** Raat din wo ādmī un gufaaoñ aur pahaaḍiyoñ par bhaṭaktā rahtā thā. Wo apne āpko patthar se choṭ maar kar zaḳhmī kar letā thā aur cheeḳḳtā-chillaatā phirtā thā. **(5)**

Us ādmī ne Īsā<sup>(a.s)</sup> ko bahut dur se hī ātā dekh liyā thā. Wo unke paas dauḍtā huā āyā aur unke qadmoñ me gir gayā. **(6)** Īsā<sup>(a.s)</sup> ne usse kahā, “E burī ruh is ādmī ke jism se baahar nikal.” Lekin wo ādmī cheeḳḳ kar bolā, “Āpko mujh se kyā chaahie, e Allaah rabbul azeem ke chune hue Maseehā? Main āpse bheekh maañgtā huñ ke āp mujhe sazā mat deejie!” **(7-8)**

Īsā<sup>(a.s)</sup> ne us ādmī se puchā, “Tumhaarā naam kyā hai?” Us ādmī ne jawaab diyā, “Merā naam fauj hai kyūñki mere añdar bahut saarī ruheñ haiñ.” **(9)** Us ādmī ne Īsā<sup>(a.s)</sup> se baar-baar yahī ḳḥushaamad karī ke wo ruhoñ ko is jagah se nā bhagaañ. **(10)** Suwroñ kā ek baḍā jhuñḍ waheen paas ke ek pahaaḍ par char rahā thā. **(11)** Un burī ruhoñ ne Īsā<sup>(a.s)</sup> se bheekh maañgī kī hameñ jaanwaroñ par chalā jaane deejie. **(12)** Īsā<sup>(a.s)</sup> ne unko ādmī ke jism se nikal kar suwroñ par jaane kī ijaazat de dī. Un burī ruhoñ ne us ādmī ko choḍ diyā aur suwroñ par sawaar ho gaañ. Tab un suwroñ kā jhuñḍ pahaaḍ se baḍī tezi se neeche utrā aur jheel me kud kar ḍub gayā. Us jhuñḍ me lagbhag do hazaar suwar the. **(13)**

Jo charwaahā un jaanwaroñ kī dekhbhaal kartā thā wo ye sab dekh kar wahaan se bhaag gayā aur apne gaañw jā kar sabko iske baare me bataayā. To sab log ye dekhne ke liye apne gharoñ se nikal paḍe. **(14)** Jab wo log Īsā<sup>(a.s)</sup> ke paas pahuñche to unhone us ādmī ko apne pure hosh aur hawaas me waheen baiṭhā dekhā. Ye wahī ādmī thā jis par bahut saarī burī ruheñ sawaar theen. Log ye dekh kar ghabrā gae ke wo ādmī pure hosh me aur sahī salaamat baiṭhā huā thā. **(15)** Wahaan par kuch log aise bhī the jinhone ye sab apnī añkhoñ se dekhā thā. Un logoñ ne baaqī sabko bataayā ke us ādmī ke upar sawaar burī ruhoñ ke saath kyā huā. Unhone jaanwaroñ ke saath hue haadse ke baare me bhī bataayā. **(16)** Tab wahaan maujud logoñ ne Īsā<sup>(a.s)</sup> se us jagah se chale jaane kī bheekh maañgne lage. **(17)** Jab Īsā<sup>(a.s)</sup> waapas āne ke liye apnī naaw par sawaar ho rahe the to wo ādmī jisko unhone burī ruhoñ se nijaat dilaaī thī, unke saath chalne kī ḳḥushaamad karne lagā. **(18)**

Īsā<sup>(a.s)</sup> ne usko saath chalne kī ijaazat naheen dī. Unhone kahā, “Apnī beewī-bacchoñ aur apne dostoñ ke paas waapas jao. Logoñ se bataao ke Allaah rabbul kareem ne tum par kitnā karam kiyā hai. Usne tumhaare upar raham kiyā hai.” **(19)** Tab wo ādmī apne ghar waapas chalā gayā aur ye daastan apne ās-paas ke das qasboñ me sabko bataaī. Usne sabko bataayā ke Īsā<sup>(a.s)</sup> ne uske liye kitnā azeem kaam kiyā hai. Saare log ye sun kar bahut hairat me paḍ gae. **(20)**